



侍郎

林志

丁之翰字季藩新建人儼之子幼從父授經經絕人稍長精五經學有文名元末兵起避亂郡城時歲饑疫罄囊以贍姻族明初授本縣學教諭遷進賢學性剛介不隨流俗造士以明體為先徵為主事以疾辭還職著潛夫集及編本府圖志人物志

按林志以丁之翰為元人今改正

倪孟賢南昌人洪武中為麗水知縣民有賣卜者嘗干謁富室不應因詣闕告大姓陳公望等五十七人聚眾謀亂命錦衣衛千戶往捕之未至孟賢詢問父老皆云無有又微服往詢見其男女耕織如故歸謂寮屬曰朝廷屬孟賢宰是邑欲令拊元元安田里豈可坐視嘉師枉受惡逆之名

即具疏聞復委耆老四十人詣闕言狀上命法司治告密者罪賜耆老酒食及道里費遣還

明史橐

按薛應旂浙江通志載倪孟賢事甚詳

冷自誠寧州人洪武庚午解元任應天府教授太祖重其經學每以先生呼之賜予甚數且命經筵進講

人物志

劉孟雍名熙以字行南昌人洪武中以人材舉授龍溪知縣縣與潮州接境山谷巖阻有陳永定者負固抄掠累歲不能制孟雍至掩擒之先是吏緣姦弊徭役不均民多流亡乃覈其戶之虛實遞為等差至是皆相率來歸勸耕省刑斷祀淫鬼邑大治秩滿遷安州知州龍溪民赴闕奏留加銜復任卒民為肖像立祠

同上

按劉孟雍林志以為新建人耆舊記又以為永樂朝人

與此小異

蕭九萬南昌人洪武歲貢為諸暨縣丞博學能詞翰嘗書容忍思慮四字疏其義揭門屏間百姓以訟至者必諄諄以是誨之後遷知華亭縣未上疏民弊五事忤旨被逮臨刑齧指血錄詩報母有微臣斬首丹心在尚有英魂返故鄉之句

浙江通志

按蕭九萬事詳見薛應旂浙江志紹興名宦傳中林志不載今采補

徐鐸字孔聲豐城人國初薦與帳前參謀授郊社署令歷陞戶部尚書坐事免起山東左布政使學術正大莅事公平

詳載山東志

豫章書

曾秉正南昌人洪武初薦授海州學正九年以天變詔羣臣

言事秉正上疏數千言大略謂創業與守成之政不同開創之初則行富國強兵之術用趨事赴功之人大統既立邦勢已固則普天之下水土所生人力所成皆邦家倉庫之積乳哺之童垂白之叟皆邦家休養之人不患不富庶惟保成業於永久爲難耳於此之時當盡革向之所爲何者足應天心何者足慰民望感應之理其效甚速帝嘉之召爲思文監丞未幾改刑部主事擢陝西參政未行會初置通政使在位數言事忤旨罷免貧不能歸鬻其四歲女帝聞大怒置腐刑不知所終

明史彙

包實夫進賢人力學明經事親至孝嘗館授于邑之太常里暮歸忽遇虎銜其衣曳至林莽中實夫曰爾欲食我肉我何憾但念父母衰老缺終身之養虎知我乎虎乃起復曳

衣至故處而去人以其爲孝誠所感

林志

黃麟字文昭弟鳳字文儀南昌人元末江右盜起奉母避難備嘗艱險入明鳳綜治家務不以勞遺兄或私語鳳盍爲蚤圖鳳曰吾兄弟自幼孤遭亂離今幸至此豈忍不義而爲此舉與其分貲產而使子孫無爭孰若全吾孝弟而使子弟自不爭乎兄弟年皆踰七十友愛不替鄉人推稱麟曰仁翁鳳曰義翁云

林志

王懷字景符師事包師魯得其奧旨隱居山林以道自處弟子受業者皆循蹈正學卒年九十四

同上

周銘字仲彝寧州人性孝友善屬文通詩書春秋三經父瑾死節有司屢舉孝廉不就自號梅月二子皆顯

同上

胡儼字若思南昌人博學于天文地理律曆醫卜無不究舉

洪武中舉鄉試授華亭縣教諭以師道自任改長垣乞便地就養復改餘干因著為令許人乞便地自儼始建文元年薦授桐城知縣鑿桐陂水溉田為民利虎傷人儼齋沐告于神虎遁去桐人祀之朱邑祠以解縉薦授翰林院檢討直文淵閣遷侍講進左春坊左庶子兼侍講儼在閣承顧問應對從容嘗不欲先人然為人少戇雖委曲終不俯仰取容悅同列因言儼學行宜為師表乃解機務拜國子監祭酒時用法嚴峻國子生或託事告歸輒坐戍邊儼至即奏除之凡朝廷著作多命儼修高皇帝實錄永樂大典皆為總裁官帝幸北京以給事中胡濙署監事召儼赴行在八年帝北征命輔皇太子留守北京十九年改北京國子監祭酒居國學者二十餘年洪熙改元以疾乞休賜敕

獎勞進太子賓客仍兼祭酒致仕宣宗即位以禮部侍郎召辭歸先後家居二十年卒年八十三

明史彙

按祭酒初典湖廣鄉試得石首楊溥卷即以經濟之學許之溥後竟為名相所著有頤庵集史傳失載

萬鋼字仕堅南昌人洪武庚申應聰明正直薦高皇帝問曰天下何人快活諸選人對皆不稱鋼從容對曰畏法度的快活上曰朕改一字守法度的快活即授廣平府同知有惠政鑿石改道石中有文曰萬鋼改路南行人咸異之廣

平民為立祠

人物志

向寶字克忠進賢人洪武進士授兵部試員外郎擢通政使以不善奏對辭改應天府尹建文中謫廣西永樂間復原官坐累繫獄左遷兩淮運判宣宗嗣位召為都御史兼詹

事給兩俸旋長南院以老疾致仕實儒者有醞籍歷官廉
介終始不移著疎菴藁

豫章書

按人物志寶作瑤

孫曰恭字恭齋豐城人永樂甲辰廷試第三授翰林編修歷
侍讀志操堅貞問學醇篤為文古而有法內閣三楊甚器
重之

人物志

按廷試時曰恭已定狀元及拆卷嫌其名若暴字遂抑
置第三人

呂爰正奉新人永樂鄉舉授兵部主事廉慎守法歷陞郎中
益練習戎務陞左通政仍理司事有武弁坐法爰正察其
枉出之一日於坐隅見有黑光帽金質而髹外意必其人
所酬亟追還之其操類此

林志

吳存字宗性南昌人洪武鄉舉授刑部主事歷遷雲貴參議
湖廣參政山東右布政使所至寬平明恕深得方面之體

善吟咏工草書

同上

石彥誠字誠之寧縣人洪武進士授武義縣丞下車召父老
立廳事再拜請相助為理或以為過彥誠曰吾誠心必能
動人府檄所部供億武義數獨多彥誠詣府力爭竟減三
之一召修永樂大典父老送之皆垂涕書成遷知徐聞縣
雖處急遽不妄撻一人公事亦未嘗不集上官按部或以
私干一毫不應大學士楊溥以學術醇正宜居近侍薦未
及徵用卒

同上

按彥誠登科考作彥成又按洪武初改寧州為寧縣至
弘治十六年從巡撫林俊請復改寧州故彥誠在洪武

中爲寧縣人先是戊辰科有艾旭後永樂甲申有曾希賢亦屬寧縣籍可考而知也

黃宗載一名垕字厚夫豐城人洪武進士授行人奉使四方未嘗受餽遺永樂初以薦爲湖廣按察司僉事巨姦宿猾多謫戍銅鼓五開間陰持官吏短長宗載榜數其罪曰不改必寘之法衆莫敢犯徵詣文淵閣修永樂大典書成受賜歸任董造海運巨艦數十艘事辦而民不擾車駕北征徵兵湖廣使者貪暴失期宗載不舉劾謫楊青驛起山東道御史巡按交趾歸無私橐改詹事府丞進吏部左侍郎英宗初被劾下獄未幾復職遷南京吏部尚書居九年乞休章四上乃許歸數年卒

明史橐

丁維南字良正豐城人明太祖倚任辟舉憲使房安雅知其

奇具以上聞授監牧署丞有政績兵部尚書劉儁薦太僕寺丞時太宗置北太僕之官方難其人維南以秩滿至遂留爲北寺丞疏陳得失始創印馬之法馬用蕃息勒碑以垂不朽四疏乞休乃允子侃字秉和洪武中隨父宦京邸會太祖命民間俊秀子弟有能誦大明律及大誥者即令入對時侃九歲父負之而至御前莊誦無遺特賜銀幣寶鈔弱冠領永樂乙酉鄉薦上南宮授閩之清流訓導陞吳江教諭建寧教授三典文衡乞休終明一代教職以名著者十一人侃與焉侃之孫鍊字質純成化甲午鄉薦主教白鹿書院戊戌會魁知淳安縣考最擢禮部祠祭司主事時纂修憲宗實錄擇廉幹官督集始末以屬鍊尋丁內艱歸廬于墓服闋補營繕司員外郎以年老乞休

人物志

龔鏖字子諫南昌人洪武鄉薦授給事中陞雲南僉事四川按察使釋死罪未決者五十餘人年七十致仕歷任四十餘年家食時田園無尺寸增益妻嘗潛買金環至家將珥鏖給取視即投諸江曰無污我平素也 林志

按豫章書鏖子二人海浩俱舉于鄉海官韶州知府廉直有父風浩自有傳

盧淵字文滅新建人洪武中由監生授兵部主事歷陞郎中擢本部侍郎建文時坐事免永樂初復任淵居官勤慎視事及暮秉燭治文書不少懈同列自茹瑞而下咸心服而倚仗焉進表至行在疽發上遣中使賜藥日伺疾輕重狀以聞還掌兵部事卒贈兵部尚書謚恭順 豫章書

王高字思登南昌人建文進士刑科給事中陞大理寺丞靖

難後與同邑劉端俱坐縱方孝孺息樹剗鼻而終隆慶中

詔祀大節祠 人物志

張顯奉新人父士原洪武初以儒士薦不起嗜經史善草書學者稱爲誠齋先生顯以明經舉靖江王府教授永樂中與修國史遷國子學正考績升監丞 豫章書

陳仲賢武寧人母病割股以進母尋愈永樂初事聞授鴻臚寺丞旌表其門 同上

徐孔奇豐城人永樂進士授刑部主事改行在刑部以清慎公平著稱陞嚴州知府疏食布衣無異寒素而愛民如子夙夜唯以興除爲亟屬官中有不能者教之不善者諭之使改未嘗輒加以罪吏民傾戴若赤子之于慈母入覲卒于邸見宣德實錄 人物志

按孔奇字失考明一統志載有徐伯恭者南昌人山西
行太僕寺少卿亦以清操著聞其字亦不可考

萬觀字經訓南昌人永樂進士召為御史改嚴州知府府東
境七里瀧溪嚴子陵釣臺址也有漁舟數百艇時剽行旅
觀編十舟為一甲令畫地巡警不匝月盜屏跡乃勵學校
勸農桑奏減織造以銀代絲稅民皆便之九年考績治行
為海內第一既以憂去將除服嚴州民豫上章願復得觀
為守金衢民亦上章乞之朝廷異焉補平陽府政績益茂
有芝生祠棟上士民皆言使君德化所致考滿擢山東布
政使卒于官 豫章書

范衷字恭肅豐城人永樂進士除壽昌知縣闢荒田二千六
百畝興水利三百四十有六區三考報最當遷邑人頌德

乞留御史以聞許之尋以外艱去服闋起知汝州吏部尚
書王直察舉天下廉吏數人衷為第一性至孝廬父墓瓜
生連枝有白兔三馴擾墓側鄉人莫不高其行 明史彙

李元凱名杰以字行豐城人永樂進士授婺源知縣時千戶
所官怙勢不法奏汰除之有採木中使橫于徽郡元凱引
義不屈棄官歸家無一畝之田從吳聘君與弼遊樂道終
身忘其困約 人物志

史安字志靜豐城人永樂進士授禮部主事遷儀制郎中宣
德二年交趾復叛兵部尚書李慶參贊軍事引安暨陳鏞
以自助師行入交趾賊于官軍所經之地悉列柵以守總
兵安遠侯柳升連破之有矜色安等言于慶曰總戎之意
驕矣安知賊不示弱以誘我乎慶以告升猶不設備明日

西江志 卷六十八
獨以數百騎先發賊伏兵四起升被槍死慶病歿副將崔聚整兵繼進賊驅象蹂之衆遂潰聚亦被執安及鏞皆死焉時守師隔遠未及其節聞

林志

按史安事詳見楊東里所撰墓表中陳鏞錢塘人官祠祭司主事

周瑾字伯榮寧縣人永樂間辟授交趾金場大使時交趾新造受命行以老母幼子託其妻止攜一蒼頭往既莅任推誠撫馭交人懷之逾數歲交人叛攻金場甚急瑾禦之不敵而死妻劉氏以節終

人物志

曹壽字曼齡豐城人文章雅澹尤工臨池永樂八年以經明行修薦授江都訓導會選宮僚擢春坊右司諫屢進詩賦御書褒獎歷翰林修撰

同上

羅觀字彥彬南昌人洪武間以人才舉授丹徒知縣治稱最永樂初擢知鎮江府聲勳益著居任久威惠孚洽遠邇畏懷纂輯郡志行于世

人物志

劉端字季莊南昌人建文進士任兵科給事中春坊庶子遷大理寺丞奉勅撫安兩廣比還會內難已靖成祖遣端復職命治方孝孺獄端抱建文勅上殿慟哭言舊君何在臣不忍殺忠良願與諸罪臣同日死忤旨坐劓刑卒臨刑有詩其結句云綱常千古事此日屬銘彝聞者悲而壯之隆慶初詔祀省城之大節祠

同上

丁鉉字用濟豐城人永樂進士歷任刑部郎中以精律例稱尚書何文淵薦爲本部右侍郎正統末寇犯京畿太監王振主親征不與外廷議及命下鉉上章言邊鄙之事惟嚴

備不必親御六師不聽及扈從行師次唐家嶺軍中夜驚失大將所在鉉歎曰是可以言用兵耶因詣帳殿力請車駕還京上不能決連章請還皆為振所沮寇奄至鉉遂遇害景泰初贈尚書謚襄愍錄其子琥官大理評事

林志

鍾甬字迪勇南昌人幼聰敏稍長即肆力聖賢之學偕族人詣京夏太常景慕其道延致于家同郡侍講孫曰恭數與還往因言甬于楊文貞欲令往見甬不屈遂就景所謁之竟亦不報謝逾月歸辟寶坻順德訓導皆不赴知府胡本惠薦令訓導本府學敦請乃就職未幾引退甬嚴毅方正抗志古人平居正襟危坐終日不見有惰容取予一介不苟或謂其矯俗不恤也時同邑萬齊領鄉薦為崇陽教諭篤學厲行與甬齊名

豫章書

熊槩字元節豐城人幼孤隨母適胡氏冒其姓永樂九年第進士授御史擢廣西按察使洪熙初元命槩與布政使周幹參政葉春同巡視應天蘇松常鎮嘉湖杭八府宣德初擢槩大理寺卿巡視如故浙西豪持郡邑短長為不法海鹽民史慶真以罪戍逃歸暴橫滋甚槩捕誅之姦宄怙息諸衛所糧運不繼軍乏食槩以便宜發諸府贖罪米四萬二千餘石贍軍乃聞于朝槩用法嚴姦民憚之騰謗書于朝行在都御史遂劾槩所至作威福帝弗問時屢遣部官至江南造紙市銅鐵槩言水滂民饑乞罷之四年還朝始復姓遷都察院右都御史治南院事卒賜祭給舟歸其喪

明史槩

按林志熊槩南昌吉安兩府重見今據史刪彼存此又

按槩所著有芝山公餘二集

徐義字伯制南昌人永樂進士授御史歷廣東副使河南布政使所至有聲祖德明洪武中以耆老入覲太祖親訪民隱給鈔五萬錠命儲粟備賑德明歸立東賑倉于乾封鄉儲穀一萬石斂散以時無毫髮侵蝕鄉民賴之

林志

胡清南昌人以明經授沂州訓導永樂中知泌陽縣持身廉謹門無私謁前宰視學校為不急務清日再視學為諸生講說在任六年卒耆民歲時致奠焉

同上

丁俊字秉存豐城人永樂進士任御史巡按福建食惟豆腐人謂之豆腐御史陳智每舉以勵羣屬以剛直忤權貴謫

嚴州推官

同上

王璉字仲瓚新建人永樂進士授監察御史宣德中巡按福

建疏發中使取花鳥者恣為貪虐狀詔即其處誅焉部中為之震慄

同上

崔彥俊字用章新建人永樂進士授思州知府府治創立彥俊至整齊法度綏撫叛亡境賴以安九載滿老幼流涕塞途長官司爭進馬保留賜秩正三品復任丁內艱復除徽州府徽俗喜訟察其健而黠者寘之法衛卒故放縱攻剽不絕一切按治後莫之敢犯農時輒行境內勸耕桑開水利垂九歲致仕歸子琬有孝行

同上

雷誠名鑑字誠智後更今名豐城人永樂進士授行人奉使稱職九載秩滿擢延平知府居官仁明廉介嘗巡行屬縣詢問疾苦豪猾為之斂跡民甚德之

人物志

舒敬字守中靖安人永樂進士授刑部主事改兵部車駕司

歷陞嘉興知府胸次洞達周悉吏民情僞發摘無遺尤加
意教化繕郡縣學課諸生以道藝時與肄習四禮坐忤鎮
守太監免同上

熊觀字用學豐城人貢入國學永樂間因精通律算教習六
館授刑科給事中改工部郎中遷常州知府廉潔公勤嚴
於御史江陰有田沒于江賦額猶在奏蠲之改知鳳陽歲
饑勸粟賑濟正統間陞山西參政所至旌廉能懲貪墨風
采凜然及致政歸執經問業者無虛日號退庵同上

聶好謙名遜以字行豐城人永樂進士正統間由刑部郎中
知廣州府凡政有益於民者不顧利害爲之決獄必以平
恕郡中稱爲仁懷太守巨寇黃蕭養聚衆攻城城中人衆
乏食好謙恐其生變即白藩臬發倉賑濟或持不可好謙

曰擅發倉廩其罪猶小若民饑生變禍不可測矣全活者
甚衆寇亦聞風散去以疾卒滿城哭聲如喪考妣賊平衆
即仰高祠祀之林志

况鍾字伯律靖安人初以吏事尚書呂震薦授儀制司主事
遷郎中宣德五年雄劇地九府缺守命部院臣舉其屬之
廉能者用尚書蹇義胡濙等薦擢鍾知蘇州馳驛之任賜
勅以遣之蘇州賦役繁重豪猾舞文爲姦利最號難治鍾
乘傳至府初視事羣吏環立請判牒鍾佯不省左右顧問
惟吏所欲行止吏大喜謂太守闇易欺越三日名詰之曰
前某事宜行若止我某事宜止若強我若輩舞文久罪當
死立捶殺數人一府大震鍾乃蠲煩苛立條教事不便民
者立上書言之屬縣逋賦四年凡七百六十餘萬石鍾請

量折以鈔爲部議所格然自是頗蠲減丁憂去民詣闕乞
留者二千餘人詔起復上書言近奉詔書募人佃官民荒
田官田準民田起科無人種者徐賦額崑山諸縣民以死
徙從軍除籍者凡三萬三千四百餘戶所遺官田名種應
準民田起稅者二千九百八十餘頃應減稅十四萬九千
餘石其他官田沒海者賦額猶存宜皆如詔書從事臣所
領七縣舊著籍三十六萬餘戶秋糧二百七十七萬九千
石有奇其中民糧止十五萬三千餘石而官糧乃至二百
六十二萬五千餘石輕重不均如此乞敕所司處置悉報
許時屢詔減蘇松重賦鍾與巡撫周忱悉心計畫奏免七
十餘萬石民大悅鍾爲政務鉅豪強植良弱興利除害不
遺餘力綜理周密簡約易行凡忱所行善政鍾皆協力成

之所積濟農倉粟歲數十萬石賑荒之外以代民間雜辦
及逋租由是流亡復業秩滿當遷部民二萬餘人走訴巡
按御史張文昌乞再任詔進二秩如民請明年冬卒官吏
民聚哭爲立祠

明史彙

黃子威名輅以字行進賢人由吏員洪武中薦署屯田司主
事改長洲縣丞滿考陞刑科給事中遷刑部員外郎永樂
初吳淞大澇蹇夏二尚書交薦擢松江知府首蠲秋稅出
廩賑給民賴以蘇宣德中以喪去官松江民乞留巡撫胡槩
以聞上謂蹇尚書曰朕聞松江煩劇難治渠遂能得人心
如此其從之後以誑誤謫戍邊其民復請得宥還職久之
乃老郡中至今祠祀焉

人物志

胡軫字敬同豐城人永樂進士歷兵部主事宣宗即位召對

稱旨授中書舍人陞夔州知府有無辜三人將服上刑軫
辨而釋之正統朝陞浙江副使理學政子經亦進士御史
按察副使風采振于中外 林志

劉顯豐城人永樂鄉舉宣德間除舒城知縣單騎赴任興學
校課農桑增開水利支分派別高下得宜為人廉直樂易
去久而民益思之立祠祀焉同邑教授李景與豕宰黃宗
載言愛民如子無如劉顯撫字有方無如范衷時稱確論
人物志

彭遠字務本南昌人永樂鄉舉知祁州宣德中累遷淮安知
府癸丑歲饑流民四至乃相隙地構舍以居之發廩粟日
給二糜稍寬齶禁即負擔者不坐所活以千萬計民間故
乏耕犢遠為假貸給予農務以興後註誤被收值中貴李

德奉使過淮安郡人擁舟大呼曰煩公語天子乞還我賢
太守事聞命遠還視事如故治為江北第一晉廣東布政
使廣俗喪葬華侈下令趣以葬期不半月暴露者皆有藏
焉旋致仕 林志

夏希純名寧以字行豐城人永樂進士授南京刑部主事歷
郎中陞陝西右參政振綱紀恤民隱調度邊餉覈斷民田
皆井然有法希純始喪母廬墓黃金城以孝聞 人物志

楊時習豐城人永樂中由吏員拜大理寺評事奏對稱旨擢
本寺卿出為交趾按察使先是黎季犛來歸賜官羈京師
忽求還祭掃時習知季犛為交人所服恐有變連疏請留
之不允後果叛同事者皆署降狀時習獨不屈懷印歸朝
自白至則已籍其家矣及檢閱文書得前疏乃復官 同上

丁倬字秉章豐城人俊之弟宣德間徵辟教職陞當塗知縣宅身清約臨民平易秩滿邑人祖雋贈以詩有一廉不著犀珠謗萬變難磨鐵石心之句

熊鍊字學淵進賢人宣德進士授刑部主事調工部改大理寺正有誣僧妖言法當死鍊獨慨然曰一僧詎足恤但明知其冤而莫之白謂官守何力解之遷浙江提學僉事廉介正直以身爲教不事條約所至宿止學宮校藝精覈高下不失錙銖久之改廣東右參議適有採珠之役鍊區處得宜民不知擾歷廣西右布政使引疾歸

林志

王得仁名仁以字行新建人本謝姓父避讎外家因冒王氏初爲衛吏以才薦授汀州府經歷廉能勤敏上下愛之秩滿當遷軍民數千人乞留詔增秩再任居三年推官缺英

宗從軍民請就令遷擢政績益著鄧茂七黨陳政景糾清流賊藍得隆等攻城得仁與守將擊敗之擒政景等八十人餘賊驚潰諸將議窮搜得仁恐濫及下令招撫辨釋難民三百人都指揮馬雄得通賊者姓名將按籍行戮得仁力請焚其籍賊復寇寧化率兵往援事未解忽遘疾衆欲輿歸就醫得仁不可曰吾一動賊必長驅乃起坐帳中諭將吏勦力平賊遂卒正統十四年冬也軍民哀慟喪還哭奠者道路相屬多繪像祀之

明史彙

謝一夔字大韶得仁子天順四年舉進士第一授修撰進諭德成化七年彗星見應詔陳五事請正宮闈親大臣開言路慎刑獄戒妄費語極剴摯被旨切責尋陞學士進禮部右侍郎會李孜省用事薦引同鄉尹直李裕劉敷等一時

彙進一夔拜工部尚書時稱傳奉官未幾卒贈太子少保
正德中謚文莊 采明史補撰

按一夔明史附得仁傳後于出處始末不甚詳今補撰
所著有力餘橐東藩倡和詩不傳傳者止文莊集二卷
甘瑛字宗華豐城人宣德進士授禮部主事正統間陞漳州
知府時軍衛強橫年例關于有司暴取無厭瑛奏革以艱
歸會邵武寇亂奪情起知邵武悉心撫戢出入山澤冒瘴
致疾乞歸成化改元詔進階瑛孝友端介始終一節鄉評
重之 人物志

湯熙字光烈新建人舉山西正統鄉試授海豐教諭正統已
已之變上禦戎十二策石亨知其才奏留贊畫熙每勸亨
以解柄謝事若康齋吳與弼之聘熙啓之也竟不及于禍

所著有燕石橐

豫章書

聶如斌豐城人宣德末任嘉善典史才能超卓且有冰操按
察使軒輓輩交賢之事涉難辦者屬如斌無不盡舉嘗職
水利令民多築隄防爲水旱備潛載小舸察其勤惰勸懲
之北鄉洿下田不償種如斌督民高其圩塍遂爲膏壤歲
值大水監司使者行縣檢災以如斌從使者有諱災語如
斌乃自投田間水深沒頂使者愧之 人物志

孫昌字曰蕃豐城人宣德四年舉鄉試第一授光山縣教諭
檄修實錄典廣西文衡大司寇楊寧以才堪大任薦陞教
授時新建學校造士爲多至以孫夫子目之復典四川應
天文衡有藻鑑聲陞國子助教卒 同上

羅篴字應韶南昌人先達胡儼稱其有倚馬才舉正統進士

授監察御史時閩盜五百餘人論死篋奏覈之全活三百餘人累遷右副都御史巡撫湖廣徭不用命乃出兵擣其巢穴平之歲饑糴粟六十萬石分道賑給全活甚衆召還掌南京都察院兼督操江上疏乞親萬幾用正人節賜予等事皆人所難言尋引疾歸著知庵集

林志

黃節字順中豐城人嘗從吳與弼學舉正統進士授兵部主事巡視古北白羊二口時冬月寇薄城令軍士以水灌城冰滑寇不得上乃去景泰末爲石尚書璞贊畫討湖湘寇以平蠻將軍李震師抵酉陽等峒襲殺賊數千級復乘勝破絞羅牛欄等峒七十八寨蓬峒尚未服節言於震宜乘兵威遣使招之可不戰而降震從其言賊爭赴營納款班師還陞署郎中歷太僕寺少卿

同上

張寰字守中新建人正統鄉舉授工部都水主事冢宰王翱才之改吏部考功司復除都水治徐州洪歲凶挽夫多竄去在官剝舫類朽敗寰至即簿錄民舫損其雇直什一以贍葺之由是官舫獲濟挽夫亦還歷遷浙江右參政致仕寰長身玉立言論洒洒動人性篤孝有盜竄尸于其父樵者父一夕見夢比歸啓視信然乃別白其尸重爲禮葬里人奇之

人物志

涂謙字恒讓豐城人正統進士授監察御史己巳之變侍講徐理請遷都金陵謙上疏極言遷幸非計時景帝監國悉從其言人心遂定景泰初巡按山西陞山東按察副使青州饑以戶部所發三千金糴米仍諭富室出粟以濟東昌諸郡又饑賑貸如青州全活甚衆後以勞勩致疾卒

林志

西江志 卷六十八
陳安字靜簡新建人正統進士授大理右寺副讞都察院獄
有跛者坐為盜安詰之曰汝等騎劫邪步劫邪僉曰步安
曰跛者能走邪囚泣曰某皮工被誣至此遂白其枉清河
縣校官以受贖為生徒所訐刑部當罪安引卓茂亭長事
奏聞得不坐遷陝西參議改雲南滇池暴漲禾盡沒軍民
大窘乃勸勵土官斟酌帑藏以賑給活人十餘萬歷湖廣
布政使致仕 同上

萬祺字維壽南昌人為郡功曹精星曆學正統間給由赴京
除鴻臚主簿景帝不豫時有議召襄王者石亨詣祺問休
咎對曰皇帝在南宮奚俟他求亨悟率眾逐英廟復辟久
之亨以祺名奏歷陞部郎會曹欽反執尚書王翱學士李
賢欲加害祺陳利害力救得免欽誅擢太常卿累官工部

尚書

同上

劉華甫名光以字行豐城人正統進士歷吏兵兩科彈劾不
遜出知蘇州府特旨得便宜行事時瀕海田為水所齧奏
免虛糧三萬餘石以疾乞歸復起曲靖府夸酋例以牛羊
金帛為餽悉付有司為修學資羅雄州逋征五載許以貨
物代準不兩月告完再引疾辭歸十餘年卒 林志

劉季清字士廉南昌人景泰進士授南大理評事富民王福
訟子不孝季清曉諭百端感泣而去逾年經江潯福引其
子來謝又有姑訴婦不孝者訊之婦弟悲泣不言所以密
問久之乃曰夫貸于鄰貧難償姑迫婦與私通以求免婦
不從耳乃逮貸主至一訊而服 豫章書

楊瑄字廷獻豐城人景泰進士授御史剛直尚氣節天順初

印馬畿內至河間民遮訴曹吉祥石亨奪其田瑄以聞并
列二人怙寵專權狀帝語閣臣李賢徐有貞曰真御史也
命吏部識瑄名將擢用吉祥聞而大懼訴于帝請罪之不
許未幾亨西征還適彗星見十三道掌道御史張鵬等將
劾亨吉祥諸違法事給事中王鉉聞之洩于亨亨乃先與
吉祥泣訴于帝誣鵬等為已誅內官張永從子結黨排陷
欲為報讎明日疏入帝大怒遂收鵬瑄及諸御史于獄榜
掠備至且詰主使者瑄等無所引乃坐都御史耿九疇羅
綺主謀亦下獄論瑄鵬死餘遣戍會大風震雷拔木發屋
須臾雨雹正陽門下馬牌飛擲郊外而亨吉祥家大木俱
折雹尤甚二人亦懼于是改戍瑄鵬鐵嶺瑄鵬行半道適
承天門災肆赦放還或謂當詣亨吉祥謝二人卒不往復

謫戍南丹憲宗即位並還故官瑄尋遷浙江副使杭州衛
指揮父子肆虐捕罪之按行海道禁將校私縱戍卒立操
法築海鹽捍海堤岸二千三百丈民得奠居為副使十餘
年政績卓然進按察使西湖水舊可溉諸縣四十六萬頃
時堙塞過半瑄請浚湖設防置牐以利灌溉功未就卒海
鹽人祠祀之

明史彙

按林志載瑄遣戍後事與史傳異今從史

楊源字貴潔豐城人瑄之子初為太僕主簿弘治八年各省
奏地震天鼓鳴源應詔陳言坐出位謫銅仁長官司吏目
徙欽天監五官監候正德元年劉瑾典兵柄源奏自八月
初大角及心宿中星動搖不止大角天王之座心宿中星
天王正位也俱宜安靜而今乃動搖意者皇上輕舉嬉戲

遊獵無度以致然耳伏望祇畏天威安居深宮絕遊嬉罷
 弓馬毋輕出入遠斥寵幸節賞賜止工役親元老大臣日
 事講習章上不報十月復奏連日霽露交作為眾邪之氣
 陰冒陽臣欺君小人擅權為下叛上瑾怒矯旨廷杖三十
 明年又奏火星入太微垣帝座之前或東或西往來不定
 宜思患預防意在瑾也疏留中瑾召源面叱之曰爾何等
 官亦欲為忠臣耶復杖三十謫戍肅州以傷重卒于河陽
 驛妻皮氏斬蘆荻覆尸葬之古城萬曆間河南撫按奏請
 建祠于河陽賜額忠愍

劉文簡公集

徐秉壽字山公南昌人正統歲貢授浙江慶元諭陞嘉祥令
 邑大侵賑活不勝紀擢保寧同知以老致仕弟秉富字存
 義正統拔貢授河南祥符令剛方諒直卓有治聲

豫章書

李裕字資德豐城人景泰進士授御史巡按陝西上安邊八
 事石彪濫報首功詔裕覈實其從父亨以書抵裕焚其書
 以實聞亨亦旋敗由是有強直聲擢山東按察使重囚二
 百餘人或經十餘年未判裕旬月間決遣殆盡大覘山賊
 寨七十餘裕捕戮巨魁縱脅從亂遂平成化初總督漕運
 兼巡撫江北諸府濬白塔孟瀆二河以便漕張秋南旺及
 淮安西湖舊編木捍衝激勞費無已裕易以石遂為永利
 淮鳳方饑太僕徵預備馬二萬匹裕論罷之在淮六歲每
 歲入計事陳利病多施行父憂歸服除留佐院事代戴縉
 為右都御史縉憲紀不立裕欲振之御史有過或遭箠撻
 由是得謗汪直敗偕副都御史屠瀟請雪諸忤直得罪者
 帝不悅奪俸又坐累調南京都察院考績赴都留為工部

尚書初吏部尚書尹旻罷耿裕代之以持正不為萬安所喜而李孜省方貴幸用事欲引鄉人乃協謀去耿裕以裕代之裕本廉介負時望以孜省故名頗損孝宗立言官交章劾裕進由孜省裕不平為辨誣錄連疏乞休去正德中卒年八十八

明史彙

熊尚初南昌人初為吏以才擢都察院都事正統中用都御史陳鎰薦遷泉州知府盜起上官檄尚初監軍不旬日降賊數百已而賊逼城下守將不敢禦尚初憤提民兵數百與晉江主簿史孟常陰陽訓術楊仕弘分統之拒于古陵坡兵敗皆遇害郡人哀之為配享忠臣廟

同上

丁傑字秉英豐城人德行淳潔博通經史隱居教授生徒景泰初御史涂謙以傑同吳與弼薦于朝下有司禮聘不起

成化改元御史陳選復薦之稱其為人倜儻不致詭激澹然無慕外心足為一方高士及卒御史唐龍行部豐城設主于明倫堂祭之

人物志

張幼文名載以字行寧縣人受學于南昌鍾甬華容人黎淳少從其父斌任寧縣丞與幼文交後以貢謁選淳為吏部侍郎未嘗私謁羣諸生試授龍虎經歷淳甚重之未幾引去操修端謹至老不渝

同上

胡全字震卿豐城人崇仁吳與弼擇壻以女妻焉處甥館厲志篤學幾二十年歸獨處一室衣食不給曠然不介于懷教宗族子姓必先小學以及大學敦實行略浮詞白沙陳獻章故同學晚與論道甚服其詣嘗有詩贈其里人云居鄰厚郭一雞飛桂樹于今大幾圍老憶舊時燈火伴青山

何處望霏微蓋為憶全而作厚郭全所居地名 同上

于大節字守正進賢人天順進士授行人擢監察御史巡按

湖廣以災異言事謫鶴慶推官歷浙江按察使風節愈高

摘伏刺姦威望大著以不阿權貴被誣遂稱疾去都憲史

琳等復交章論薦改山東按察使卒于官歷仕三十餘年

清介絕俗攻苦茹淡終始一操 同上

李瓛字世望豐城人景泰進士授御史巡按南畿陞貴州僉

事調四川嘗劾湛總兵謀叛事得實籍其家時論快之擢

松潘兵備副使時徐謝二指揮有邊功為當道所抑瓛奏

陞之其人佯為獻果投金五百兩為謝瓛怒而拒曰薦賢

為國豈望報邪其人慚而退以疾卒官蜀人祠於名宦 林志

游明字大昇豐城人景泰進士授刑部主事時草場火責在

典守中官反誣附場衛卒縱火下法司擬罪明直其冤衛

卒得不死通州軍儲倉歲以中官受賂虛出通關賣糧不

下千石倉吏欲發其事中官賂以金吏持金訴于官戶部

以中官故劾吏知情明謂大吏乾沒而小吏發之今轉坐

告者罪是縱姦也竟白其枉天順末遷福建提學僉事修

葺楊龜山羅豫章李延平諸先生祠及書院訪其子孫向

學者補諸生八郡翕然宗仰滿九載都御史滕昭奏留加

按察副使仍督學政卒諸生繪像祀于常袞祠 人物志

范鏞字彥聲豐城人衷之子景泰進士授刑部主事歷郎中

陞廣西按察副使時潯梧鬱林等處寇勢方張奉都御史

韓雍檄親抵賊巢名其酋長諭以逆順皆望風服有流賊

西江志 卷六十一
猝至鏞督官兵捕殺之又以輕舟入大藤峽降其衆巡至博羅陸川岑溪等縣築城衛民藉以無警改分巡桂平道建永安州未幾潯鬱賊起都御史朱英檄鏞往討賊聞鏞再至大驚叩頭請罪遷按察使又督師破于靈山降鬱林賊千餘人 同上

王朝遠名漢以字行進賢人景泰進士授監察御史天順中與同臺共劾石亨降衡山知縣未行會天變還職巡按廣東徭蠻入境守臣故匿不報朝遠以狀聞勅韓都御史雍往討平之陞陝西按察副使尋陞按察使歲饑奏免稅糧及弛茶鹽諸禁民賴全活成化間擢左僉都御史鎮守甘肅以疾引歸 林志

樊瑾字公瑾南昌人景泰鄉薦知吳縣改績溪尋調彭山時

松潘苗亂中丞夏瑱以瑾諳天文知兵略舉參戎事嘗出師見黑雲起自西方謂敵有伏兵宜防之帥不從果敗 同上

楊暄字好善南昌人由歲貢累任德州知州不以家累自隨歲早祈禱不用師巫徒跣行赤日中焦勞致疾卒僚屬視故篋惟常服一褐衫猶未仕時所製也 同上

陳粟字景充南昌人景泰鄉舉知漳平縣縣新創庶務叢委粟敏于集事凡官府解署學校壇壝以次就緒聞鎮海陳真晟講正學延舍後堂師事之頑獷為之嚮化在任五年以憂去漳民頌之不忘 人物志

毛瓊字漸明豐城人景泰鄉舉授鳳翔府同知寶雞縣有渠久湮瓊復疏之民稱為毛公渠陞長沙府時攸縣多虎為

文告城隍神不二日捕獲其六七餘虎遁去秩滿巡按奏
留加四品俸視事未幾卒 同上

熊懷字性安豐城人天順進士授刑部主事遷廣平知府歲
饑發廩賑之全活甚衆改知衛輝府治最擢廣東參政時
瀧水猺獍猖獗師旅頻興懷轉餉不絕寇平賜銀幣歷左
布政使弘治初冢宰數薦懷任巡撫以素不通問餽為當
軸者所尼久之遷南京光祿卿進南刑部侍郎以老乞休
林志

涂棐豐城人天順進士成化中嘗言祖宗朝政事必與大臣
面議自先帝幼冲未能裁決柄國者慮其缺遺假簡易之
辭以便宣布凡視朝奏事諭旨輒曰所司知之此一時權
宜非可循為定制况批答多參以中官內閣或不與尤乖

祖制乞復面議杜蔽壅之弊不能用終廣東副使 明史彙

按棐為廣東副使備兵瓊州時稱其持法嚴峻請託不
行遂失重臣意屬郡僚訐其過遣刑部郎官即訊棐素
負氣不食而卒後陳白沙過江西步往拜其墓云

劉子肅字敬之南昌人景泰進士為人精悍嚴重初除刑部
主事錦衣指揮門達怙寵弄權入朝失貂裘欲置主者罪
子肅但杖出之門達出憾語不為動出為福建僉事歸十
年卒 林志

涂觀字恒孚豐城人謙之弟天順進士成化間歷南京吏部
考功郎中察京朝官與章侍郎綸力爭可否既連署以上
綸復別疏請汰十餘人命廷臣葉盛覈之竟從觀言遷衢
州知府政尚寬平民懷其惠復知寧國尋致仕居家以孝

友著性坦直雖面折人人不為忤二子昇且並舉進士昇
別有傳旦都給事歷湖廣左布政使有才能著稱

林志

按涂觀所著有六書音義今不傳

張元禎字廷祥南昌人生而靈異比七歲寧獻王召試韻語
目為神童天順進士授編修與時宰不合移疾去弘治初
召修實錄晉左贊善遷南京侍講學士以母老謝歸久之
召修會典加學士特置日講孝宗雅意嚮用為設低几就
聽之旋以母憂去後召為太常卿兼學士掌詹事仍侍經
筵康陵踐祚進吏部左侍郎尋乞致仕屢章弗許以疾卒
所述易書詩春秋要語四書集要太極圖說要綱目近思
錄家語解皆未脫橐萬曆間謚文裕始宸濠浮慕元禎伺
其家居數有餉饋度不可辭笥而藏之即食品必計值以

入歿後濠果使問其室介孫默捧笥以進稱亡祖遺命愧
無一言頌盛德負大王恩啓視纖悉不遺濠為之愧服有

東白先生集二十四卷

豫章書

丁璐字元美豐城人天順進士授工部主事有權閹至同官
咸屈膝璐獨挺立權閹怒欲辱之璐向闕大呼眾挽之詰
旦皆詣謝璐竟不往諸閹時時於工部索匠璐一切杜絕
欲具奏聞自此相戒無敢復索匠者成化間陞敘州知府
百戶王甲占慶符縣民田數百畝且聚亡命負固璐以計
擒治籍田而歸之民有張乙者匿其兄遺貲兄子詣府投
牒璐祕之令園中盜指乙受某贓物乙拊心誓曰是皆吾
兄物有何名為贓乃出牒示俾以三之二歸其兄子諭之
和好如初九載陞廣東左參政在敘城長寧在廣城饒平

皆親自綜理冒瘴以歿

林志

楊崇字尚賢豐城人受吳聘君之學于胡九韶天順鄉舉任桂林府同知行陽朔縣顧縣治瞰江垣堞庫甚使人輦江石大者增其垣小者積垣下未幾蠻寇驟至莫能涉有以筏薄岸者挈所積石擊之扶傷而去都御史韓雍征大藤峽檄造戰船應期而辦陞柳州知府復除知永州府境內山田多旱崇親視渠堰連歲有秋築祁陽城善規畫民不告勞先是永州徭役不均請于當道行九等之法遂推其法于各郡又下令男女婚嫁從宜不得論賄貧甚者官給以布帛州縣婚嫁者九千有奇舊俗爲之一變以子廉貴贈南京禮部尚書

人物志

胡涇字源潔豐城人天順進士授監察御史按南畿捕宣城

大猾汪深置之法有道會匿民婦居夾壁間已踰年婦家誣其夫殺而沉諸江妄指他尸實之已伏罪涇廉得更其獄列郡以爲神復按雲南上疏減銀冶歲課銀十有二萬滇人頌之陞雲南按察副使改陝西卒于官

同上

黃琥字瑩之豐城人天順鄉舉授臨洮府同知嘗督賦平涼以所得羨餘代民輸逋額岷州用師督餉數萬區處不乏洮民歲苦河決作浮梁以濟涉民祠祀之先是參將王杲納賄違法所司莫敢問御史熊翀屬琥得其罪狀弘治初陞肇慶知府隍舊有魚課緡錢以供鎮守中貴率辦于民琥至罷之積粟萬餘石以備荒又捍潮築堤亘二百里擢廣東參政致仕

林志

熊景字開甫南昌人成化進士授刑部主事時部多大獄中

官因緣爲市尚書輒以屬景按法一不爲動擢廣西按察
僉事先是潯桂諸徭頻出爲擾景陰募人習徭中委曲者
僞作鹽賈負鹽詣徭所徭不疑聚而問虛實答曰吾賈人
不知新按察爲何人然見其方治巨噐若古壺狀者百數
實石其中室以巨木計曰徭出降無庸發此不然當以此
破大藤峽徭具白其酋越數日詣景降尋以母老乞休
上

萬福字季崇進賢人成化進士時冢宰王端毅欲釐正鹽法
授福兩淮運副分司故有歲例餘鹽盡革之又白督漕御
史豁免各場存積竈丁銀以甦賠累遷南京刑部員外郎
出知金華府會逆瑾遣其黨四出校尉樊信恨福無所覬
誣以廢事脅吏部勒令致仕在林下二十年子若孫接踵

科第子鎡知府鏜吏部尚書孫潮右副都御史浩南京禮
部侍郎累世鼎貴人謂厚德之報云同上

艾璞字德潤南昌人成化進士授兵部主事累官至副都御
史巡撫蘇松先是魏國公徐備與無錫民訟田璞奉命勘
實斷田子民備銜之遂陰賂劉瑾下其奏復遣勘使者承
望風指劾璞前讞非是逮下錦衣衛獄抗辯不屈獄具杖
五十盡室編海南爲民瑾誅復官致仕言路交薦未及徵
而卒璞嘗奉詔求言陳修德六事聖政四事及爲光祿卿
時請減齋醮供事冗費侃侃有直臣風用未盡究士論惜
之人物志

按林志敘璞事本末不詳今改撰

涂昇字卿儀豐城人觀子成化進士授鹽亭知縣復知蒲臺

寬平愷悌民安其政擢監察御史弘治間彗見天津陳時
政六事清寧宮災疏謹天戒上皆嘉納又劾權閹李廣及
其黨當軸者有所祈免昇弗聽未幾陞廣東副使有通番
巨商號八仙為中官羽翼盡擒治謫戍邊姦民李招鐵詐
稱進貢廉得置于法饒平劇盜蘇孟凱據鳳凰山熾甚以
計散其脅從搗穴平之奉命採珠閩瑾私請不遂銜之後
致政家居瑾中以御史時事罰米千石輸雲中 張文僖集
按林志不載事詳張文僖公所撰墓志中又按昇所著
有南巡錄及奏議今不傳。

周季麟字公瑞寧州人成化進士授兵部主事遷郎中尚書
余子俊馬文升皆器之李孜省以左道進有寵恒推轂其
鄉人季麟固不往弘治間陞浙江左參政歷河南左布政

使周王列其世子罪狀季麟為寬譬調護世子感泣引咎
王亦解慈孝如初擢右副都御史巡撫甘肅奏停歲織絨
褐以濟兵荒用閣臣薦改鎮薊州會勘御馬監牧場考證
圖籍還侵地以予民中貴人不敢撓旋引疾歸後逆瑾擅
權以事落職罰米千石輸邊瑾誅復官卒贈右都御史謚
僖敏 人物志

熊達字成章南昌人成化進士授溧陽知縣興學校毀淫祠
煮糜粥以活饑民立義冢以絕水葬擢監察御史弘治間
劾太常卿崔志端起家道流姦邪褻瀆召致火災歷真定
知府福建左參政以註誤謫知夔州府致政歸年九十三
而終 同上

熊繡字汝明豐城人占籍湖廣道州成化進士授行人擢御

史巡按陝西坐劾布政于璠一作潘貪狀謫清豐知縣起知鳳翔府歲旱禱于岐山須臾大雨遷山東參政歷右副都御史巡撫延綏改兵部左侍郎未幾以右都御史巡撫兩廣征賀縣獍賊斬二千八百餘人俘獲四百有奇召掌南京都察院始繡在兵部結怨中閹後劉瑾用事密使人至兩廣蹤跡其過見繡自廩米常給外秋毫無取矯旨勒致仕憾猶未釋又以大同浥爛布豆為繡巡撫時罪諷科道論劾提問罰米五百石輸宣大倉瑾誅召為南京刑部尚書未幾卒諡莊簡同上

按繡為刑部尚書在劉瑾伏誅之後林志以為贈官者訛今改正

丁隆字時雍南昌人成化進士授太平知縣持操嚼然人有

丁若水之謠嘗築堤捍海至今名為丁公堤擢監察御史弘治初巡按湖廣發姦持憲無所徇得罪權貴謫判光州稍徙延平府同知沙寇猖獗隆督兵分捕事平錄功遷廣西僉事歷陞兵備副使以老乞休林志

龔浩南昌人鏊子成化鄉舉其妻徐與李孜省妻兄弟也孜省方貴幸浩上春官獨不往至目為林靈素孜省中傷之授祿勸州知州尋改潞南值勦竹子龜山二寨兵興浩獨建議主撫遂單車入寨宣示恩威二酋歸順不戮一人而還人物志

熊一定字廣恒豐城人成化鄉舉授光化知縣陞知澧州舊有洲地樵牧資焉華陽王府專其利一定力請以予民九谿土千戶唐冠向子通怙險殺人按之伏辜積粟累數萬

西江志 卷六十一
斛值歲大侵藉以存濟尤重風教親自講課士習為之興起以事被逮既白遂致仕弟一中以鄉舉任泉州府推官有靖寇功士民立石紀其德政 同上

魏默字本純新建人成化鄉舉知光澤縣銳然以興學變俗為已任延禮他郡名士以課其邑之俊秀暇則躬為之講經義亶亶不倦性剛明幹濟請託不行後家居所著有介

庵小草 林志

羅經字大常南昌人成化進士授大理寺評事歷寺正遷廣東僉事備兵瓊州瓊懸隔海外分巡者多失所守經介特自持歸囊無瓊物改提學卒官 同上

周季鳳字公儀寧州人季麟之弟弘治進士授刑部主事遷郎中陞四川按察副使備兵建昌抑鎮守太監張辰之橫

解士官木泰刺馬琦之讎以治辦聞改雲南督學歷湖廣左布政使平嘉魚寇賀章等擢右副都御史巡撫保定進南京刑部右侍郎以人言解職起右都御史總理漕儲巡撫應天未上卒贈刑部尚書謚康惠季鳳有文學嘗著來軒漫槁修江備考修江先賢錄 豫章書

按明朝謚典親兄弟得謚者閩縣林文僖廷機林康懿廷梈靈寶許恭襄論莊敏誥與二周凡三家僖敏以清節著康惠以文學著江右雖多名賢于周為盛矣

楊峻字惟高進賢人成化進士授丹徒知縣陞御史出為廣東僉事歷任浙江左布政使一剗蠹弊吏不敢欺鎮守方橫取于民督及有司峻面數其罪且欲以鐵索與共拘孿詣京師其勢稍戢陞南京光祿寺卿寺歲進酒屬吏往往

以西江志 卷六十一
以酒敗獲罪峻請命巡倉者監之始無宿累遂著為令尋
引年乞休峻為人嚴毅剛介其于政事精敏自始仕時已
然居官所守始終如一親喪廬墓至老不宴飲云
舒梓溪文鈔

按楊峻林志不載詳見舒文節公集今采補又按楊所
著有豐川集而舒所撰楊傳中失載

季源字本清進賢人成化進士授刑科給事中奉勅理兩廣
邊儲莅事嚴怒軍民使之遷都吏科居諫垣十餘年凡彈
劾一上輒焚其橐以故人罕傳之進太常少卿歸卒
林志

李漢字允昭成化進士除刑科給事中改工科嘗奉使寧藩
贖金一無所受周藩與大臣交惡奉詔往訊奏云待宗室
當以恩處大臣當以禮事得兩釋初登進士吏部尚書裕

其從伯父也方掌銓衡特遠其居不以家聲自耀與羅玘
相友善卓有才品
同上

陳伯宣字弘化靖安諸生方居父喪母熊氏尋沒廬墓者五
年忽感萱草叢生子恩舉弘治甲子鄉試母舒氏患風症
遇異人言樹藤煮酒可療如言母疾愈踰年復苦痰咳乃
啗涎驗其味酸苦母果不起會父左股患毒將危禱以身
代後瘥事繼母不異所生詔旌父子孝行之門
林志

宋景字以賢奉新人弘治進士知睢州改御史抗逆瑾遂引
疾歸以薦起浙江僉事陞山西副使會介休縣饑盜起景
獲其渠魁禁捕盜者無妄斷首級民賴以安擢本省布政
累官南兵部尚書召為都御史未幾卒贈太子少保謚莊
靖
豫章書

萬鏜字仕鳴進賢人弘治進士授刑部主事改吏部歷文選郎中累遷南京都察院右副都御史進兵部右侍郎尋陟南院右都御史時肅皇因彗字之變求直言鏜歷陳時政八事切責遣歸田十餘載值湖廣苗梗化詔推素有才識堪大事者朝議歸鏜遂起家拜右副都御史往勘夷情鏜單車就道相機勦撫不逾月奏捷所擒斬以萬計兼陳久安保治大計十事是後更無苗患尋陞兵部左侍郎擢南刑部尚書進禮部尚書召入爲吏部尚書加太子少保以忤權勢奪職歸隆慶初追復官著有治齋文集 人物志

范兆祥字延和豐城人七歲作登堯山詩稱神童弘治進士選授檢討侍涇王講讀災異陳言大略謂君后分主陰陽且引紀伯姬叔姬事以諷又謂團營官軍無益宜罷歸三

大營通州倉糧宜并運入京倉上謂事涉宮闈非所宜言下錦衣衛獄贖杖還職出爲涇府長史忤王國中人復逮詔獄謫戍永州尋放歸兆祥自負才節故屢遭困踣而其氣不衰 同上

按范兆祥所著有半松遺墨

熊卓字士選豐城人弘治進士授平湖知縣正德初召爲監察御史值雷震養鷹房疏陳時事明年巡按廣東投牒籲冤者人人至前言狀豪強股栗吏有干簞簞者望風先遁未及旬日劉瑾誣以姦黨勒致仕卓在臺爲都御史張敷華所噐重不附瑾故爲所陷未幾卒詩名與北地信陽相伯仲有熊士選集 同上

葉釗字時勉豐城人弘治進士除南京刑部主事守備中貴

西漢志 卷六十一
侵蘆洲判歸之民應天諸府災上荒政四事尋進員外郎
武宗立應詔陳言宣大被寇殺卒幾千人監督中官苗達
妄報首功乞召還候勘官官典兵於古未見唐始用之而
宗社丘墟我正統朝用之而鑾輿北狩自今軍務勿遣監
督鎮守者亦宜撤還且國初宦官悉隸禮部秩不過四品
職不過埽除今請仍隸之部易置司禮俾供雜役罷革東
廠移為他署斯左右不得擅權而後天下可安瑾見釗疏
甚憤釗又乞召還劉大夏宥諫官戴銑等瑾益怒坐斷獄
註誤逮下詔獄削籍歸瑾誅起禮部員外郎未聞命卒學
者祀之石鼓書院中 明史彙

朱廷聲字克諧進賢人弘治進士授行人選御史正德初疏
請誅便佞杜逸游以安宗社其略曰邇者聞近侍太監馬

永成谷大用劉瑾等各逞姦計作為淫巧以蠱惑聖聰或
導引遊畋或搬弄雜劇馳馬試箭殆無虛日忘情作樂每
至夜分而又時出輒城東門外微行物議譁然今人怨天
怒災異四起未必不由是數人以致之也望陛下念先帝
付託之重自今伊始留意於難保之天命割恩於壞法之
小人急勅法司將馬永成等明正典刑以昭陛下平明之
治疏上忤諸閹意後劉瑾用事逐諸元老因列廷聲于黨
籍勒致仕瑾敗起南京刑部主事歷陞浙江僉事湖廣按
察副使福建左布政使右副都御史巡撫湖廣會荆襄饑
疫奏發帑金賑之擢刑部右侍郎致仕歸平生清白自矢
及退處澹若無官里中尤服其品云 人物志

魏榮字喬儀新建人默之子弘治進士授行人司副上書言

事無所避忌歷福建參政時古田流賊盤據議者欲屠之
蔡曰倡亂者馬周良也誅止渠魁耳賊竟解散去民得免
株連共肖像祀之同上

羅明南昌人由吏員任劔州判官正德六年鄢藍等寇數萬
攻城明誓以死守城竟不支被執罵賊以死男諸生介奮
身救父亦死之詔卹廕同上

張元春字幼仁新建人弘治進士授山陰知縣遷知滁州淮
上大饑賑恤道殍多所全濟轉蘇州府同知流賊將犯境
元春守太倉常熟誓以身殉民賴之陞知梧州府值軍門
初建承檄整理以功進秩三品後歸里孫少保位貴贈太
子太保吏部尚書兼文淵閣大學士同上

張元相字居仁新建人有詩名登經明行修科官寧藩教授

署長史事知濠有逆謀每諫不聽逆將發啖以高官不從
而相兄元春初官山陰知縣相隨任受學于王守仁時撫
虔相乃密走虔言其狀相歸正觴母高夫人濠遣校尉火
信縛相并其弟舉人元龍禁之煅煉備至高夫人戒以必
不可持二心先自縊及濠成擒守仁兵至省乃出相龍于
獄相刑殘不用龍官至山東鹽運使同上

楊廉字方震豐城人父崇廉承家學早以文行稱舉成化進
士改庶吉士授南京戶科給事中明年京師地震劾用事
大臣五年以災異上六事末言遇大政宜召大臣面議給
事御史隨入駁正帝頗納之母喪服闋起任刑科請祀薛
瑄取讀書錄貯國學以父老欲便養復改南京兵科遷光
祿少卿歷順天府尹時京軍數出車費動數千金廉請大

興遞運所餘銀供之奏免夏稅萬五千石慮州縣巧取民財置歲辦簿吏無能為姦擢南京禮部右侍郎帝南巡駐南京命百官戎服朝見廉不可乞用常儀更請謁見太廟世宗嗣位就遷尚書廉與羅欽順善為居敬窮理之學文必根六經自禮樂錢穀至星曆算數具識其本末學者稱月湖先生凡八上疏乞休賜勅馳驛給夫廩如制家居二年卒年七十四贈太子少保謚文恪

明史彙

按月湖所著有太極圖纂洪範纂要國朝名臣言行錄理學名臣言行錄及淨橐續橐遺橐四橐五橐六橐統名月湖集羅文莊稱其旁搜博取窮源反約名實相副為醇儒云

江潭字朝東豐城人成化進士授南京屯田主事嘗奉部檄

覈蘆洲權璫賄不行同官有中其餌者以語撼之不為動屢與司空爭事可否不肯苟徇丁內艱服除赴銓卒于京潭學問精博所用未究人皆惜之

過成山分省人物考

舒綱本姓陳進賢人舉成化辛卯鄉試一上春官不第遂棄科舉之業勵志聖賢博究羣書父喪廬墓三年事母孝撫弟孤恤族中婚葬者動遵古禮主教白鹿洞師道尊嚴有古人風

同上

趙秉貞字正夫新建人弘治甲子科鄉舉知淳安縣設銅鑼縣門欲愬者擊之冤無不直旋改衡陽縣捐俸賑饑作歌勸農又于驛路夾植榕松以便行者性至孝母病剖肉饋羹以進家範甚整子弟肅然舒文節謂其有古人風著有公餘錄

林志

舒芬字國裳進賢人正德十二年進士第一授修撰時武宗數微行畋遊無度其明年孝貞皇后崩甫踰月欲幸宣府託言往視山陵罷沿道兵衛芬累章切諫不報乞歸養不許又明年三月帝議南巡時寧王宸濠久蓄異謀與近倖相結人情惶懼言官伏闕諫忤旨被責讓芬憂之與夏良勝萬潮汪應軫連章入諫又偕編修崔桐庶吉士江暉王廷臣馬汝驥曹嘉等合疏謂陛下之出不過如秦皇漢武侈心爲樂而已非能行巡狩之禮者也博浪柏人其禍亦可鑒矣尚有事堪痛哭不忍言者宗藩蓄劉濞之釁大臣懷馮道之心以祿位爲故物以朝署爲市廛以陛下爲弈棋以革除年間爲故事特左右寵倖知術短淺無能以此言告陛下耳使陛下得聞此言雖禁門之外亦將警蹕而

出尚敢輕騎慢遊哉疏入帝大怒命跪闕下五日期滿復杖之三十芬創甚幾斃時帝欲尊崇本生芬偕其僚連章極諫及張璉桂萼方獻夫驟擢學士芬及同官楊維聰編修王思羞與同列拜疏乞罷未幾復偕同官楊慎等伏左順門哭爭帝怒下廷杖奪俸如初旋遭母喪歸卒於家年四十四世稱忠孝狀元學者稱梓溪先生萬曆中追謚文節先是修撰羅倫以諫謫福建提舉踰六十年而芬繼之與倫同鄉同官所謫地與官又同福建士大夫遂祀芬配倫云

明史彙

萬潮字汝信進賢人正德進士由寧國府推官入爲儀制主事與舒芬夏良勝陳九川稱江西四諫世宗立起故官歷浙江提學副使久之遷參政以忤權貴調廣西屢遷陝西

左布政使擢右副都御史巡撫延綏所至著聲績同上

按明史萬潮無專傳附見舒芬傳後其生平事蹟詳費文進所撰墓碑中文多不具錄

胡訓字誨之南昌人里中稱爲長者弘治進士由行人擢御史歷浙江按察僉事改廣東兵備緝捕海盜有功歷湖廣浙江布政使以右副都御史巡撫雲南嘉靖初掌南京都察院每事持大體官至太子少保南京兵部尚書致仕林志

按胡訓宦蹟詳見費鍾石所撰墓志中

周期雍字汝和寧州人正德進士授南京御史劉瑾誅爲瑾斥者悉起給事中李光翰趙士賢等御史史良佐朱廷聲等部郎李夢陽等以兼劾羣阉未得錄期雍偕同官王佩

力請皆召用兵部尚書王敞附瑾進期雍請斥之焦芳劉宇猶在列而劉大夏韓文楊守隨林瀚張敷華未雪期雍皆極論之尋清軍廣東轉福建僉事宸濠反簡銳卒赴討會賊平乃還嘉靖中累遷都御史巡撫順天薊州密雲關堡數十以避寇警盡移入內地寇騎益長驅期雍悉修復之入爲大理卿歷刑部尚書明年以風霾罷免大臣期雍遂去位家居十年卒明史彙

按期雍與族祖季麟季鳳先後立朝皆著風績時稱修水三周而明史獨爲期雍立傳餘詳人物志中

喻茂堅字汝礪豐城人四川榮昌縣籍正德進士知銅陵臨海二縣以卓異擢監察御史諫南巡及疏都御史王守仁擒逆濠功嘉靖初巡按陝西發總兵李隆嗾成卒殺巡撫

許銘狀又請復設總督拂貴臣意出為真定知府歷右副都御史撫治鄖陽改巡撫應天累拜刑部尚書

豫章書

熊浹字說之南昌人正德進士授給事中嘗諫武廟南狩嘉靖初以河南參議召修明倫大典擢僉都御史大典成轉左副都坐持張福獄與東廠杓鑿罷歸起南京禮部尚書踰年拜吏部尚書所引拔皆天下知名士粟帛存問其母會方士胡大順以箕仙進欲祠奉內庭浹上疏力斥箕仙之妄忤旨切責閱月竟下錦衣獄遣官校械繫還編氓隆慶初贈少保謚恭肅

同上

涂敬字寅之豐城人弘治進士授行人選御史嘉靖間巡按廣東劾故相子都指揮使梁次攄冒官怙勢螫毒鄉民乞正其罪以謝嶺南衆庶之憤仁壽宮災疏言比年以來元

老大臣相繼而去羣臣抗疏謫戍編發呂柟馬卿等之降過在可原王相王思之死情尤可憫張璉等倖取於捷徑郭柟等遠逮於道途錦衣衛之冒濫弗覈御用監之匠役增收陳林等之榷木陸宣等之乞俸先朝弊政漸次踵行此皆臣等學不足以格君心以致政多闕失上千天和乞賜罷黜疏入報聞陞廣東按察副使罷歸累薦不起

志

人物

查仲道字文夫寧州人正德進士授兵部武庫司主事會當南巡伏闕號諫杖於廷嘉靖初遷郎中陞杭州知府時織造太監吳勳橫甚仲道每事輒阻抑之竟為所誣逮至京謫福建運同轉知汀州府卒於官民為之立祠

同上

鄧顯麒字文瑞奉新人正德進士任行人司副諫南巡廷杖

謫國子監學正京闈分考拔楊維聰後為廷試第一士論服其知人擢御史上疏請講明聖賢有用之學以圖嘉靖中興之治又疏言戚畹陳萬言治第撥官軍八千員名及差官往蔚州買木俱宜停免有夢虹奏議二卷同上

按武宗時疏諫南巡者物自舒文節同時諸公或連章或獨奏江西人居多不獨四諫也若查鄧二人史傳所不載姓名幾就湮沒特為表而出之

熊蘭字天秀南昌人正德進士授行人擢監察御史逆濠將叛密與同年御史蕭淮言之遂發其謀濠果反嘉靖中巡按廣東所至旌廉黜貪人莫敢犯有王指揮者或誣以失律當斬繫獄十餘年訊知其寃并其黨數十人皆得末減用事者反疑其矯激遷太平知府到官五日罷歸廣人莫

不惜之弟舉人葛剛正不屈於濠羈禁歲餘窘脅備至幾死終不肯附仕至知縣同上

舒柏字國用靖安人正德鄉舉從王文成學授歙縣訓導以四禮五倫為教歷陞梧州府同知從文成平田州有贊畫功遷南京刑部員外出知南寧府有亞學繫言等書同上

姜儀字君肅南昌人正德進士歷鳳陽永州廣平推官陞刑部主事出為福建按察僉事遷浙江右參議湖廣榔桂兵備副使參政貴州擢福建布政使自公俸外纖毫不以入籍閱一期所積羨餘幾萬兩值建寧大歉發庫藏金及所積羨餘援之活數萬眾進右副都御史巡撫湖廣奉命征苗破重寨三十餘所先是詔儀會同貴州巡撫王學益并力協征學益畏忌不進儀疏劾之王被逮赴京分宜嚴世

西江志 卷六十八
蕃其姻親也嗾言官劾儀師久費財責令罷兵遂謫廣東
左參議以疾乞休家居十八年卒所著有周易口義淡谿
姜氏事實

按姜儀林志人物志所載失實今改撰

李金字宣之豐城人正德進士授碭山知縣時流寇猖獗金
率民築城以禦之工未竟而寇奄至坐謫吳江丞歷兵部
郎中與同官疏諫南巡杖于廷嘉靖初陞台州知府歲饑
易穀隣郡以為賑所活不可勝計引年致仕生平力行清
儉蔬布之風至老不渝祀碭山名宦人物志

朱槩字尚節豐城人正德進士知吳縣調旌德陞刑部主事
歷員外郎疏諫南巡廷杖奪俸遷四川按察僉事平番寇
阿戎之叛歷河南參政時鎮守軍夜被殺遺斧或疑屠者

王弼既誣服槩取其斧拭之無脂膏膩辨非屠者立出之
人皆傾服同上

萬木鄭山俱新建人宸濠遣閹校四出籍民田廬收縛不附
已者木與山集鄉人結砦自固賊黨謝重一馳馬入村執
之積葦張睢陽廟前縛重一并馬生焚之二人飲江上為
盜所傷趣見宸濠烙而椎之皆罵賊死明史槩

趙楠南昌諸生兄模嘗捐粟佐賑宸濠夜捕模索金楠代兄
往脅以威不屈被掠死同上

辜增南昌人宸濠反見迫抗節不從一家百口皆死同時有
諸生劉世倫儒士陳維官義士李廣源皆被掠不屈死同
上

按萬木以下數人林志人物志豫章書俱失載今采史

補入

樊準字曰式進賢人南昌籍正德鄉舉知徐州廉介彊立政務節財先是中使督廣運倉儲其左右恣甚準至以法繩束之無敢犯會貢鮮中使橫索郵傳供億不貲準輒加裁抑被誣逮繫老幼號泣送者萬人抵京事白得調歷官山西按察僉事

人物志

高宇字弘望豐城人少孤貧刻意古道正德鄉舉任常德府推官擒劇盜杜卿獲贓萬計毫不自入遷南京刑部主事歷陞程番知府捐俸繕學置學田社田數百畝挺身解宣尉司之變以治最聞竟解綬去讀書講學白首無倦程番府後改為貴陽

豫章書

葉景恩新建人兄弟皆以俠聞族居吳城宸濠將反捕景恩

脅降之不從死獄中及宸濠兵過吳城景恩弟景充以二百人邀擊不勝賊分兵焚劫其家族衆景集景修等四十九人皆死之

明史彙

朱拱枏明宗室瑞昌王府輔國中尉宸渠長子封奉國將軍性至孝年十四母范氏危疾翦左手股肉煎湯飲母得愈父疾篤藥勿效又翦臂肉煎湯飲亦愈正德己卯宸濠變逮遷宸渠中土拱枏請代父遷越三年復還冠帶孝養益至嘉靖十年賜詔褒獎以為宗藩之勸後居父母喪啓酒致奠酒壺內產異芝堅實如木一時當事及縉紳士夫有孝感異芝詩傳于世

林志

魏季蕃字清野南昌人奉母舒氏盡孝母性嗜橘於庭前種橘二本歲取實以供母十年後母沒樹亦枯隨有鳥來巢

西江志 卷六十八
悲鳴三載終喪鳥去枯樹復甦人以為孝感所致同時陳
白沙舒梓溪皆有詩文美之嘉靖十七年撫按上其事給
照旌表 據胡璉疏稟

西江志卷第六十八

西江志卷第六十九

人物 四

南昌府 四

明

曾鈞字廷和進賢人嘉靖進士授行人擢南京禮科給事中
時四方銀場得不償費且為盜窟鈞奏罷之鈞剛廉疾俗
首劾罷參贊尚書劉龍已劾翊國公郭勛禮部尚書嚴嵩
未幾劾工部侍郎蔣淦延綏巡撫趙錦最後劾罷操江都
御史柴經直聲震一時出為雲南副使兩司詣黔國公率
廷謁鈞始正其禮且釐還所侵麗江民地遷四川參政黔
寇亂撫定之屢遷河南左布政使以右副都御史總理河
道徐邳等十七州縣連被水患帝憂之趣上方略鈞請濬

